


AKUERDO DI GOBERNASHON 2016 - 2020



DIGNIDAT HUMANO TA SENTRAL

Akuero di Gobernashon

2016 – 2020


Dignidat Humano ta Sentral

15 desèmber 2016

E partidonan:

- ❖ Partido MAN (MAN);
- ❖ Partido Alternativa Real (PAR);
- ❖ Partido Nashonal di Pueblo (PNP)
- ❖ Partido Pueblo Soberano (PS),


Ta deklará di a yega na e siguiente Akuero di Gobernashon:



Partido MAN / sr Hensley Koeiman



Partido Alternativa Real (PAR) / sra Zita Jesus-Leito



16-12-2016
Partido Nashonal di Pueblo (PNP) / sr Humphrey Davelaar

Partido Pueblo Soberano (PS) / sr Jaime Córdoba

Kontenido

Introdukshon	5
Preámbulo	6
1. Asuntunan General (AZ)	9
1.1 Bon Gobernashon.....	9
1.2 Relashon den Reino.....	9
1.3 Integridat.....	9
1.4 Struktura estatal.....	10
1.5 Relashonnan eksterior	10
1.6 Refinería	10
2. Maneho di Gobièrnu, Planifikashon i Servisio Pùbliko (BPD).....	11
2.1 Servisio na pùbliko	11
2.2 Aparato gubernamental en general.....	11
2.3 Empleado pùbliko.....	11
2.4 Struktura di gobernashon	12
3. Hustisia	13
3.1 Prevenshon i resosialisashon	13
3.2 Represhon	15
3.3 Mehorá i fortifiká instansianan den e kadena hudisial.....	15
4. Finansa	17
4.1 Presupuesto balansá	17
4.2 “Financieel beheer”	17
4.3 Subi entrada	17
4.4 Baha gastu	18
4.5 Kamara di Presupuesto (“Begrotingskamer”)).....	18
4.6 Banko Sentral komparti.....	18
4.7 Impuesto	18
4.8 Sektor Finansiero International.....	18
4.9 Tratadonan Fiskal International	18

4.10	Tratado di "Duana"	18
4.11	Akshonan.....	18
4.12	Sektor Energetiko	19
5.	Enseñansa, Siensia, Kultura Deporte (OWCS)	20
5.1	Enseñansa i Siensia.....	20
5.2	Kultura	23
5.3	Deporte	24
6.	Salubridat,Medio Ambiente, i Naturalesa (GMN)	26
6.1	Prevenshon.....	26
6.2	Hospital nobo	26
6.3	Leinan di seguro	26
6.4	Edat di penshun.....	26
6.5	Eskases di speshalista.....	26
6.6	Inspeksion	26
6.7	Kuido di medio ambiente i naturalesa	27
6.8	Bienestar di animal.....	27
6.9	Raad voor de Volksgezondheid i otro leinan.....	26
6.10	Maneho di agrikultura Peska i Krio di Bestia	27
7.	Desaroyo Sosial, Labor i Bienestar(SOAW)	28
7.1	Situashon sosial i kalidat di bida	28
7.2	Fortifikashon di Famia	28
7.3	Formashon.....	28
7.4	Labor.....	29
7.5	Suèldu mínimo	29
8.	Desaroyo Ekonómiko	31
8.1	Sektornan di atenshon spesial	31
8.2	Refineria Petrolero i su áeranan di sosten.....	32
8.3	Turismo	32
8.4	Sektor Finansiero Internashonal	32

8.5	Sektor logístico (Haf marítimo i Aeropuerto).....	33
8.6	Impresa Mikro i MKB.....	33
8.7	Koperativismo	33
8.8	Digital Economy ('Smartnation')	34
8.9	Diplomasia Ekonómiko Internashonal	34
8.10	Revitalisashon ekonómiko	34
8.11	"Centraal Planbureau".....	34
9.	Tráfiko, Transporte i Planifikashon Urbano (VVRP)	35
9.1	Maneho di tereno	35
9.2	Destinashon di Tereno (EOP)	35
9.3	Bibienda.....	35
9.4	Transporte Públiko	36
9.5	Tráfiko Sigur	36
9.6	Bario	36
9.7	Sektor marítimo.....	37
9.8	Telekomunikashon	37
9.9	Aviashon	37

Introdukshon

E Akuerdo di Gobernashon aki pa motibunan práktiko i pa ta konkreto pa loke ta su ehekushon, lo ta parti den 9 kapítulo kual nan ta korespondé ku e 9 ministerionan ku nos konosé na e momentunan aki.

Esaki ta enserá ku tantu e área ku e ministerio mes ta kubri como e kompanianan di gobièrnu, fundashonnan di gobièrnu i otro instansianan liá ku gobièrnu ku ta determinante pa e direkshon di maneho ku lo ser hibá, lo ser trata den e kapítulo korespondiente.

E akuerdo aki ta e kompas di maneho di pais Kòrsou, riba kual kada ministerio mester nabegá. Pero mester agregá mesora ku pa logra metanan hopi biaha lo bai tin mester di koperashon estrecho entre ministerionan. E koperashon aki lo ser inisiá den Konseho di Minister i lo filtra yega den ministerionan.

E akuerdo aki ta formulá di tal forma ku e akshonnan ta suficiente konkreto pa gobernashon por kuminsá.

Ku e akuerdo aki como punto di salida, denter di 3 luna e Gobièrnu nobo aki lo por presentá un Programa di Gobernashon, den kual e diferente puntonan i akshonnan di e Akuerdo lo ser tratá den detaye.

Ku e Akuerdo di Gobernashon aki den man i mas despues e Programa di Gobernashon, e direkshon di maneho di un banda lo ta kla pa esnan ku ta goberná i esnan na kabes di e ministerionan. Pero di otro banda lo e ta un vehíkulo di kontrol di pueblo pa vigilá si Gobièrnu ta kumpli ku loke a primintí.

PREÁMBULO

Kòrsou pa e periodo 2016 – 2020 ta haña un Gobièrnu ku lo ta sostené pa e partidonan: Partido MAN, Partido Alternativa Real (PAR), Partido Nashonal di Pueblo (PNP) i Partido Pueblo Soberano (PS).

A yega na un akuerdo di gobernashon ku ta basá riba e siguiente puntonan di salida.

1. Konsiderando e desigualdat sosial enorme den nos komunidat, partidonan ke kontribuí na un Kòrsou sosio-ekonómiko fuerte, kaminda tin hustisia sosial, ta seif i tin siguridat i kaminda dignitat humano ta sentral pa krea un nashon pa un desaroyo sostenibel pa futuro generashonnan di Kòrsou.
2. Partidonan den e periodo di gobernashon benidero lo kontribuí pa yega na un komunidat kaminda:
 - ta garantísá igualdad di derechi político, ekonómiko i sosial i oportunidad igual pa tur hende sin tene kuenta ku rasa, religion, género i etnisidad;
 - tin derechi i siguridat pa kada hende pa e por desaroyá i logra e mihó oportunidadnan den bida segun su kapasidatnan;
 - kada ser humano tin derechi riba un bida ku ta brinda satisfakshon di su nesesidatnan básiko manera alimentashon, bibienda, seguridat, aseptashon sosial, rekonolementu i desaroyo propio.
3. Partidonan ta komprometé nan mes pa enfoká mas riba siguiente gruponan/áreanan, pa asina logra inklushon di tur hende i grupo den komunidat:
 - trahadónan ku te ainda tin ku lucha pa mehorá nan kondishonnan di trabou i ta biba den insiguridat pa motibu di leinan sosial i laboral ku no ta duna nan suficiente protekshon;
 - penshonadonan ku a keda konfrontá ku medidanan di gobièrnu ku tabatin efektonan riba nan forsa di compra i nan bida sosial-ekonómiko;
 - personanan ku limitashon físiko i mental ku ta karesé di provishonnan básiko pa asina por biba un bida di kalidat komo ser humano
 - personanan sin perspektiva riba trabou i ku ta un periodo largu for di e proceso laboral;
 - hóbennan en general ku sea a kai for di e sistema di enseñansa i/òf ta desempleo i hóbennan ku ta kaba enseñansa avansá i superior sin por haña trabou;
 - famianan bibando den situashonnan sosial-ekonómiko difísil;
 - barionan den deterioro i marginá ku problemanan serio di kriminalidat i desempleo i ku falta di perspektiva pa hóbennan;
 - skolnan ku falta mantenshon i medionan (p.e. teknología) pa por ofresé un enseñansa ku ta kuadra ku eksigensianan moderno.

4. Partidonan lo restablesé konfiansa di nos pueblo den política i nos sistema di gobernashon i krea un ambiente di transparensia, integridat i bon gobernashon. Den e kuadro aki lo duna rèspect, konfiansa i protekshon na e kuerpo di empleadonan públiko ku mester karga i ehekutá e programa di gobernashon, lo fortifiká e órganonan di kontrol i kombatí korupshon. Tambe Partidonan lo fortifiká e sistemanan di konsulta ku representashon di sindikalismo, koperativanan i sektornan komersial/empresarial, religioso i gruponan sosial/kultural.
5. Partidonan lo garantisá un finansa público salú ku un presupuesto ekilibrá pa mas aña, promoviendo un repartishon hustu di bienes i entrada kaminda esnan ku skouder mas hanchu mester aportá mas tantu.
6. Partidonan ta konkordá ku den próksimo periodo di gobernashon bario lo fungi como un instrumento prinsipal pa desaroyo di komunidat i como tal lo sòru pa e pre-kondishonnan pa realisá un maneho di desaroyo integral i duradero pa bario.
7. Partidonan ke logra un komunidat den kual un i tur ta disponé di e nesesidatnan básiko i di e oportunidatnan igual, un komunidat den kual tin enseñansa adekuá i ku ta aksesibel pa tur mucha/hóben. Un enseñansa ku ta pone énfasis riba formashon integral di nos hóbennan i adultonan pa asina nan por alkansá nan máximo potensial pa duna un kontribushon na un desaroyo positivo di nos komunidat. Un enseñansa ku huntu ku áreanan di kultura, arte i deporte mester fungi como instrumentonan pa un desaroyo sano i emansipatorio di nos pueblo.
Tambe un enseñansa ku ta akapará mas tantu posibel e nesesidatnan di nos merkado laboral.
8. Partidonan ta komprometé nan mes pa garantisá nos pueblo akseso na un sistema di salubridat integral ku ta di un kalidat adekuá i efektivo, kaminda ta pone atenshon riba aspekonan di prevenshon i huntu ku esaki promové un salubridat partisipativo, kaminda médikonan i paramédikonan den kuido primario ta partisipá aktivamente den aktivitatnan den Unidatnan di Bario pa promové un estilo di bida saludabel.
Pa esaki disponibilidat di fondonan di salú mester bira punto di atenshon.
9. Partidonan ta para pa un aserkamentu di kombatimentu di kriminalidat kaminda tin un balansa entre prevenshon i refreshon, pa asina sigurá ku tur hende por biba trankil i sin miedu i gosa di nan libertat. Hustisia sosial restorativo den e kuadro aki mester hunga un ròl importante.
10. Partidonan ke traha pa yega na un infrastruktura i transporte público adekuá i ademas suficiente bibienda pa pueblo di Kòrsou.

11. Partidonan lo promové un sistema energético duradero i sostenibel den kua nos mes ta produsí nos energia entre otro hasiendo uzo di solo, bientu i laman . Den e kuadro aki lo traha inkansablemente pa tene nos refineria habrí na un manera responsabel pa ku nos medio ambiente i salú.
12. Partidonan ta para pa un vishon/mishon di futuro ku ta enserá un komunidat sosial i hustu, ekológiamente balansá, ku ta produsí su propio kuminda mas tantu ku ta posibel, ku un ekonomia miksto di industria, servisionan, turismo i agrikultura, krio di bestia i peska i marítimo. Un komunidat teknológiamente avansá, den kua bario i koperativa ta hunga un papel determinante. Den esaki mester yega na un maneho di awa ku ta basá riba e konsepto di maneho di awa integrá.
13. Partidonan lo enfoká riba un desaroyo i krementu ekonómiko duradero kaminda gobièrnu, sektor komersial/industrial i sindikalismo ta partnernan komplementario. Pa logra e desaroyo ekonómiko aki mester tin un lugá prominente pa ekonomia sosial i koperativismo.
Den e kuadro aki lo tene debido kuenta ku e Plan Nashonal di Desaroyo di Kòrsou, trahá pa UNDP.
14. Partidonan lo enfoká riba esfuersonan pa nos pais sigui riba e kaminda di emansipashon político i den e kuadro aki lo kana konsiente i diligente e kaminda pa mas pronto posibel i di un forma responsabel yega na terminashon di e leinan di konsenso.
15. Partidonan lo buska formanan pa krea lasonan fuerte di koperashon ku partnernan den Reino, un ke otro basa riba rèspect mutuo, pa saka mas benefisio pa e pueblo.

1. Asuntunan General (AZ)

E gobièrnu aki ta para pa práktika i norma di Bon Gobernashon.

Esaki en general ta nifiká un Gobièrnu limpi, kapas, eficiente i íntegro, ku ta goberná na bienestar di su siudadanonan.

Gobièrnu ta respetá prinsipionan di bon gobernashon, e.o. di transparensia, igualdat, seguridat hudisial, bon motivashon i di konfiansa legítimo.

Gobièrnu lo hiba un maneho estriktó pa balansá su presupuesto, kontrolá su gastunan, minimalisá burokrasia i apliká prosesonan eficiente i transparente di atministrashon e.o. di pèrmitnan i lo krea kondishonnan (fiskal) atraktivo pa empresanan lokal i esnan di afó. Hasiendo esaki, gobièrnu alabes ta evitá tur estorbo di su banda pa ekonomia di pais Kòrsou.

Gobièrnu den kuadro di su maneho di Asuntunan General lo traha efektivamente riba edifikashon di pais. ('nation building')

1.1 Bon Gobernashon

Pa logra tur esakinan den e gobièrnu nobo aki lo mester:

1. Invertí di un forma strukturá i transparente den rekursó humano, teknología i inovashon;
2. Kombatí korupshon i hiba un gobernashon kla i transparente;
3. Intensivá kèntròl den nos aparato público dor di reforsá i empoderá instansianan di kèntròl.

Den e kuadro di bon gobernashon lo traha pa yega na un kuadro den kua akshonista/doño si por via su komisarionan (RvC) ta mantené un kèntròl riba NV-nan di gobièrnu, fundashonnan di gobièrnu i ZBO i garantísá ku nan ta funshoná konforme e línea di maneho general ku gobièrnu a stipulá pa loke ta e área ku nan ta kubri. Lo alinea esakinan mas ku e maneho di Gobièrnu, pero respetando sí nan funshonamentu como entidat hurídiko.

1.2 Relashon den Reino

Lo traha riba un bon relashon i bon koperashon ku tur e paisnan den Reino, ku énfasis riba rèspect mutuo, rèspect pa nos outonomía, dignitat i igualdat.

Pa por alkansá esaki ta entre otro nesesario pa azeptá e Areglo di Disputa manera a keda akordá entre representashon di e 4 parlamentonan di e 4 paisnan den Reino.

E relashon entre paisnan den Reino semper por ser ankrá den akuerdonan.

Pa loke ta e relashon ku Hulanda lo duna mas kontenido na Kas di Kòrsou i e funshon di e Minister Plenipotensiario, entre otro pa loke ta atkisishon ekonómiko i kon ta atendé ku asuntunan di yunan di Kòrsou na Hulanda.

1.3 Integridat

Integridat di mandatarionan i parlamentarionan ta di gran importansia, no solamente pa loke ta konfiansa di siudadanonan, pero tambe pa invershonianan i en general pa bon funshonamentu di nos estado di derechi. Pa halsa nivel di integridat e Gobièrnu aki lo tuma e siguiente pasonan.

- Lo studia kon pa introdusí un lei, ku ta pone ku mandatarionan/parlamentarionan outomáticamente ta suspendé si nan haña un sentensia di mas ku un aña pa un krímen, miéntras nan ta den funshon.
- Lo inisiá un kampaña di informashon pa hasi poblashon di Kòrsou mas konsiente i resistente kontra e peliger di infiltrashon den nos gobernashon di kriminalidat lokal i internashonal, ku ta menasá bienestar di e generashon aktual i futuro.
- Lo introdusí kódigo di integridat pa empleadonan público den funshonnan haltu i esnan na kabes di instansianan importante manera Banco Sentral, Kontrolaria General i miembranan di "Hoge Colleges van Staat", etc. Pa esaki e lei aktual di "screening" lo sirbi como punto di salida.

1.4 Struktura estatal

E gobièrnu aki ta para firme tras di e posishon ku nos pais mester sigui riba e kaminda pa realisá su emansipashon político i den e quadro aki lo kana konsiente i diligente e kaminda pa mas pronto posibel i di un forma responsabel yega na terminashon di e leinan di konsenso. Komo parti di e proseso aki lo tende komunidat di un forma demokrático. Finalmente pueblo lo disidí tokante e direkshon estatal di nos pais.

E leinan di konsenso entre tantu a pasa nan periodo di 5 aña i e evaluashon konforme lei a tuma lugá. Gobièrnu lo duna "follow up" na e evaluashon i presentá esaki na Parlamento.

1.5 Relashonnan eksterior

Mester pone pa aña dos persona ku un preparashon universitario pa siguí e kurso di diplomasia y su implementashon na DBB.

Lo kuminsá analisá ta kua ta e paisnan den kua nos ke pone nos representantenan na embahada di Reino i yega na un akuerdo ku Reino tokante repartishon i renumerashon di trabou. Esaki tantu diplomático como komersial.

Mester pone mas atenshon na implementashon di tratadonan internashonal i regla pa Kòrsou haña miembresia den organisashonnan regional ku full derecho di voto.

1.6 Refineria

E "lease" ku PDVSA pa loke ta operashon di nos refineria ta vense na final di 2019. Antisipando riba e finalisashon aki un MOU i Heads of Agreement a ser firmá ku un kompania estatal di China. Ta antisipá invershonnán kuantioso den e sektor energético i oumento di kapasidat di almasená na Bullenbaai.

Gobièrnu lo sòru pa e projekto aki resultá den unu eksitoso.

2. Maneho di Gobièrnu, Planifikashon i Servisio Pùbliko (BPD)

Gobièrnu lo aktua konforme prinsipionan di bon gobernashon, e.o. di transparensia, igualdat, integridat, seguridat hудisial, bon motivashon i di konfiansa legítimo. Ministerio di Maneho di Gobernashon, Planifikashon i Servisio Pùbliko ta un ministerio ku su tarea di mas importante ta duna servisio. E organisashonnan ku ta kai bou di e ministerio aki tei pa duna servisio tantu na e aparato gubernamental como na pùbliko.

2.1 Servisio na pùbliko

Duna prioritat na introdushon di "E-Government" di forma integral, basá riba e produktonan ku tin mas petishon for di pùbliko.

Gobièrnu ta revisá tur e diferente prosesonan i ta hasi adaptashonnan pa yega na un servisio sentralisá pe ta mas mihó i mas eficiente.

Introdusí sertifikasihon di servisio na pùbliko segun standard internashonal pa halsa i garantísá kalidat i transparensia.

2.2 Aparato gubernamental en general

Lo evaluá e efektividat di e lei di struktura di gobièrnu ("Landsverordening Ambtelijke Bestuurlijke Organisatie") i implementá eventual rekomendashonnan.

Lo krea oportunidat pa e personal den servisio pùbliko por profesionalisá nan mes i asina duna mihó servisio, i alabes krese personalmente na saber.

Pa loke ta servisio di e aparato (gobièrnu) na komunitat lo enfoká riba e siguiente puntonan di akshon.

- Mehorá atministrashon di Gobièrnu i asina alsa kalidat di servisio i aksesibilidat na pùbliko.
- Alsa kalidat di servisio na pueblo pa medio di e sistemanan moderno, transparente i "online", kaminda e diferente servisionan i departamentonan di Gobièrnu ta sinkronisá ku otro na bienestar di komunitat.

2.3 Empleado pùblico

Evaluá e proceso di alokashon di empleado pùblico den e struktura gubernamental i hasi e adaptashonnan nesesario.

Inová manejo di rekursu humano di e siguiente formanan.

- a. Lo introdusí kursonan di rekapasitashon pa hisa e nivel di e empleado pùblico.
Esaki lo por kai bou di un di nos institutonan di Enseñansa Superior.
- b. Krea insentivonan nobo pa atraé empleadonan nobo.
- c. Siguí atendé kondishonnan di trabou i posishon hurídiko di e empleado pùblico.
- d. Atendé ku urgensiá e problemática di empleadonan pùblico ku pa un òf otro motibu ta sintá na kas sin ta traha.
- e. Lo introdusí un sistema nobo di evaluashon di funshon.

E minister di BPD lo reuní regular den CGOA ku representantenan sindikal pa atendé e posishon hurídiko di e empleado pùblico.

Mester krea oportunidat obligatorio den e aparato público pa studiantenan lokal por kore "stage" i asina krea konbibensia i e sentido di responsabilidat serka nan i pa pasa e konosementu di e empleado público di un forma profeshonal pa nos hobennan.

2.4 Struktura di gobernashon

Gobièrnu lo sigui ku esfuersonan pa drecha e struktura di gobernashon mediante entre otro siguiente akshonnan.

- Introducí un "centraal planbureau" pa yuda ku iniciativanan di maneho pa gobièrnu i asina asistí ku retonan di nos komunitat.
- Independisá Konseho Supremo Elektoral dor di trese kambio den "kiesreglement", pa asina garantísá independensia, integridat i transparensia den e proseso elektoral.
- Revisá e struktura gubernamental na nivel di Ministerio ("business plan") i hasi e adaptashon nesesario ku bista riba optimalisashon di e proseso di tomo di desishon
- Digitalisá e archivo gubernamental pa alsa aksesibilidat di dokumentonan pa por optimalisá funshonamentu di gobièrnu i servisio na público.
- Lo analisá alohamentu di e ámtenarnan i drecha esaki. Lo buska na mes momentu un forma pa sentralisá e ofisinanan di Gobièrnu.

3. Hustisia

Un preokupashon grandi i urgente den pueblo di Kòrsou ta siguridat.

Hendenan tin miedu di entre otro ladronisia i atrako i ta sinti nan mes insigur asta den nan mes kas.

Un otro preokupashon resien ta e vulnerabelidat di organisashonnan den nos komunitat pa ku "cybercrime". Nos ta den un situashon ku siguridat den nos komunitat no ta na e nivel deseabel. E siudadano diariamente ta keda konfrontá direktamente óf indirektamente ku krímen óf konsekuensianan di krímen. Esaki ta kondusí na mémos trankilidat den pueblo. Poblashon i komunitat mester por tin konfiansa ku na un manera adekuá ta kombatí tantu e kriminalidat ku tin un influensia grandi i direkto riba e sentido di siguridat, como esun ku ta mémos visibel pero ku por lo mémos ta di un forma mesun dañino. P'esei intervension efektivo ta nesesario. E intervension aki mester ta visibel i notabel pa e víktima, malechor i e komunitat den su totalidat.

Tin krímen grandi ku ainda no a keda solushoná kompletu i esaki a fortifiká aun mas e sentido di insiguridat.

No por logra un kambio duradero pa yega na un komunitat mas seif i mas hustu ku mémos kriminalidat i mas integridat sin partisipashon efektivo di e komunitat ei mes. Ta imperativo pa krea un konsensi kolektivo i un opinion público ku ta kondusí na un compromiso di akshon di siudadano, kompania, organisashonnan sosial i di media. Di e manera aki komunitat por manifestá su mes como un partner esencial pa yega na un kambio.

E gobièrnu aki konsekuentemente lo bai hiba un maneho ku e pueblo por mira i sinti resultado, basá riba un bon balanse entre medidanan preventivo i represivo.

Gobièrnu tin 3 punto di lansa pa loke ta siguridat den nos komunitat.

1. Prevension i resosialisashon;
2. Kontrolá kumplimentu di regla i lei a base di sero-toleransia (refreshon);
3. Mehorá i fortifiká instansianan den e kadena hudisial.

3.1 Prevension i resosialisashon

Prevension ta responsabilidat di henter komunitat i ta enserá un maneho ku ta apliká medidanan sistemátiko dirigi pa evitá komportashon desviante.

Prevension ta eksihí un koperashon integral di diferente Ministerio, pues un kombinashon di kapasidat, kalidat, diversidat, selektividat i un embolbimentu di otro su strategianan.

Mas polis visibel riba kaya i den areanan stratégiko di nos komunitat tambe lo por yuda prevení krímen.

Esaki lo wòrdú logra tambe dor di introdusí e konsepto di e asina yama 'buurtregisseur'.

Na mes momentu mester keda invertí den sistemanan "inteligente" (p.e. kámara) pa prevení kriminalidat i resolvé krímen pa asina yuda halsa e sentido di siguridat. Importante ta pa sigui kombatí krímen chikí den kuadro di e maneho di sero-toleransia pa asina yuda evitá krímen mas grandi.

Lo instruí Ministerio Público pa bai apliká mas kastigunan alternativo segun lei i reglanan eksistente.

Lo studia e posibilidat pa baha e durashon di un asina yamá “strafblad” pa motibu ku esaki ta impedí ku esnan ku a kometé un delito i a resosialisá, ta haña un trabou.

Sentronan di bario lo haña atenshon speshal pa nan keda mihó uzá pa duna formashon na abitantenan, mayornan i spesialmente na hóbennan. Alabes via e sentronan di bario lo enbolí abitantenan, ku konosé mihó ken ta ken den e bario, den kombatimentu di kriminalidat. Di e manera aki Gobièrnu ta haña un mihó bista di e problemanan den e bario i kon mester hisa e siguridat den e bario konserní.

Pa realisá e tarea di formashon aki den e barionan, ministerio di Hustisia lo presentá proposishonnan, ku ta pidi estrecho koperashon di otro ministerio, por ehèmpel Ministerio di SOAW i OWCS. Tambe mester di un bon kampaña di informashon.

Sentronan di bario lo por fungi como un plataforma kaminda instansianan ku ta aktivo den barionan en general i tambe den asina yamá “(probleem)wijken” por bini huntu i interkambiá eksperensia i strategia.

Lo studia e nesesidat pa bini ku un re-zonifikashon di sentronan di bario.

Prevenshon i resosialisashon mester ta dirigi riba famia en general i spesifikamente riba hóbennan, espesialmente esnan ku ta kore e riesgo di kue kaminda di kriminalidat. Den e kuadro aki lo studia e posibilidat pa bini ku e asina yamá “leerwerktrajecten” pa hóbennan ku a bin den kontakto ku hustisia. Banda di esaki lo bini ku diferente otro proyektonan pa prevení i kombati kriminalidat bou di hóbennan manera p.e.:

- “Kamer begeleid wonen project”;
- “Veiligheidshuis”;
- Guia pa Prevenshon i Supervision;
- Instituto penitensiario di resosialisashon pa hóbennan;
- “Centraal Meldpunt Kinderbescherming”.

Mester duna incentivo na sektor privá pa e hóbennan aki realmente por haña un segundo oportunidat. Pa esaki por ta eksitoso mester bini ku programanan di konsientisashon pa komunidat kompletu.

Lo revisá nos sistemanan di resosialisashon di esnan ku kometé krímen i bini ku programanan integral mas efektivo pa evitá residivismo. Resosialisashon mester inisiá for di momentu di detenshon.

Lo studia posibilidat pa re-introducí sentronan di edukashon pa nos hóbennan ku no tin un bon guia i formashon na kas.

3.2 Represhon

Represhon mester keda atendé den e kadena hudisial ku ta konsistí di entre otro Polis, Korte, Kustwacht i Ministerio Pùblico. Duana tambe ta importante den e parti di represhon.

Den e aspekto di kontròl, e maneho lo ta unu basa riba un programa dirigí riba kombatimentu di ilegalidat en general i en espesial kontra poseshon di arma, trafikashon i poseshon di droga, atrako, korupshon, trafikashon di hende, formashon di organisashonnan kriminal, “cybercrime” i permanensia ilegal di estranheronan na Kòrsou. Lo apliká e lei di imigrashon di un forma estriktó.

Algun akshonnan konkretó di e gobièrnu aki pa loke ta e maneho di sero-toleransia lo ta entre otro lo siguiente.

- Uza mas polis riba kaya di un forma eficiente pa hasi tareanan di kontròl i mantenshon na un manera visibel i konvisente. Banda di esaki polis lo mester bai funshaná mas proaktivo basá riba informashon atkerí di fuentenan konfiabel, e asina yamá “informatie gestuurde politie”.
- Mester ekipá tur e instansianan den e kadena hudisial entre otro polis, SDKK, ministerio pùblico, i Korte di Hustisia, ku suficiente trahadó kalifiká i tambe material pa atendé ku kriminalidat den nos pais. Lo mehorá mobilidat i kapasidat di vigilansia di polis ku medionan adekuá i moderno p.e.: Quad, Baiskel, Motosaikel, Kámara i Drones.
- Lo hasi uso intensivo di medionan elektróniko manera vigilansia di kámara, informashon digital i tur otro teknologia nobo/moderno ku lo yuda den kombatimentu di krímen.
- Ministerio Pùblico, lo kontinuá ku e sistema di “hustisia rápido” pa delito chikitú. Esaki lo yuda pa esnan enbolbí pensa bon promé nan kometé un delito, pasobra e kastigu ta sigui inmediatamente.
- Lo krea posibilidat pa implementá ‘hustisia restourativo’.
- Korupshon ta mina nos estado di derecho i ta mishi ku medionan finansiero ku lo por a ser destiná pa esnan mas débil den komunidat. Den e kuadro aki lo implementá un maneho firme pa kombatí korupshon.
- Lo evaluá e funshonamentu i e maneho di “afpakteam” pa konfiská tur bienes ku wòrdú atkerí ku fondonan di aktonan kriminal.
- Polis lo intensivá kòntròlnan den tráfiko.
- Turismo ta un fuente di entrada importante pa Kòrsou i como tal lo evaluá e desaroyo di Politur pa brinda seguridat i asina yuda protehá nos sektor turístiko (‘safe tourism’).
- Pa kombatí kriminalidat ku ta krusa frontera manera entre otro labamentu di plaka, trafikashon di hende, transporte di droga i terorismo lo sigui invertí den mas protekshon di nos fronteranan i den lasonan di koperashon den Reino i ku otro paisnan den Region.

3.3 Mehorá i fortifiká instansianan den e kadena hudisial

Hustisia lo kumpli ku su tarea basá riba un maneho di mas aña, bon deliniá, konopá na un presupuesto realístico, un asina yamá “verantwoorde beleidsbegroting”. Ku un presupuesto realístico por mehorá i fortifiká e kadena hudisial pa e por funshaná mas efektivo na bienestar di nos komunidat.

Akshon konkretó ku e gobièrnu aki lo bai tuma riba e tereno aki ta entre otro, optimalisashon di e koperashon entre RST i kuerpo polisial lokal. Esaki saliendo for di e punto di bista ku al final e

minister lokal ta keda responsabel. E koperashon mester keda inkorporá integral den e kuerpo lokal.

Pa loke ta trata tantu investigashonnan lokal como esnan ku ta krusa frontera, esakinan mester tuma lugá bou di responsabilidat di e minister di hustisia di Kòrsou. Pa loke ta trata investigashonnan ku ta krusa frontera, si ta nesesario lo por buska refuerso di outoridat den Reino of den regio.

A base di e resultado di e evaluashon di e leinan di konsenso lo tuma un desishon final riba e problematiko di un PG kompartí si òf no.

Otro akshonnan den kuadro di un maneho dirigí pa kombatí kriminalidat ta lo siguiente.

- Analisá efektividat di Warda Kosta pa esaki hiba na un funshonamentu mas efektivo na fabor di Kòrsou.
- Yega na optimalisashon di e asina yamá ‘businessplan’ di Ministerio di Hustisia pa e ministerio por atendé di un forma mas eficiente ku e tareanan i e retonan grandi ku mester keda atendé.
- Introducí “roadwatch”, outoridat di tráfiko, i laga esaki hasi kontrol kontinuo di tráfiko (e.o. riba alkohòl, arma, droga, dokumentonan i komportashon). Esaki huntu ku kámara pa vigilá pasamentu den lus kórá i otro infrakshonnan den tráfiko.
- Adaptá lei pa pone responsabilidat pa infrakshonnan den tráfiko serka doño di e number di outo;
- Yega na un sistema di registrashon riba kual tur servisio di hustisia ta konektá i por interkambiá informashon ku otro pa por hisa efisiensia di e asina yama “ACT systeem”.
- Krea un órgano lokal duradero pa vigilá i evaluá optimalisashon i funshonamentu di tantu nos kuerpo polisial i di prizòn en konekshon ku ehekushon di e asina yama “Plannen van Aanpak”.
- Evaluá funshonamentu di skol di polis.
- Studia e nesesidat i e posibilidat di un prizòn nobo.
- Konstruí un kompleho di sèlnan di polis nobo ku ta kumpli ku tur eksigensianan internashonal i lokal.
- Pèrkurá pa mantenshon di e ekiponan nobo ku a atkerí di brantwer i kaminda ta nesesario lo kumpra ekipto i sòru pa suficiente personal pa por garantísá seguridat di nos komunitat ora tin un kalamidat.
- Mantené e stashon na Banda Abou operashonal.

4. Finansa

Finansa Públiko lo tin como meta krea suficiente entrada pa sirbi bienestar di e "hende" atraves di un repartishon hustu.

E gobièrnu aki ta rekonosé e principio di un presupuesto balansá i lo sigui hasi esfuerzo pa mantené esaki asina.

Partidonan lo mantené e kuota di debe na normanan internashonal.

4.1 Presupuesto balansá

Un maneho di presupuesto mester ta responsabel i mester kumpli ku e kriterionan di balansa entre entrada i salida pa loka ta gastu koriente o sea "gewone dienst", manteniendo e "gewone dienst" den balansa.

Den presupuesto di pais mester bin mas direkshon di maneho i planifikashon pa loka ta trata fiansa riba merkado di kapital.

4.2 "Financieel beheer"

Un maneho finansiero sano ta esencial pa sigui hasi tur otro meta di maneho gubernamental posibel. Gobièrnu lo kontinuá e liña pa stablisá e situashon finansiero públiko i duna kuenta i rason na pueblo via relatonan anual.

4.3 Subi entrada

Gobièrnu lo evaluá posibilidatnan pa generá mas entrada pa gobièrnu dor di entre otro revishon di nos leinan fiskal, un miró maneho di kobraansa, miró kontròl i mas outomatisashon. Tambe mester yega na un sistema kaminda kompanianan di gobièrnu ta funshaná di tal manera ku nan por duna gobièrnu anualmente un suma mínimo na dividendo. Di e forma aki lo krea un base pa por baha peso di impuesto pa esnan ekónomicamente mas débil.

Lo evaluá i mehorá e "tax compliance" eksistente. Lo laga evaluá posibilidat pa PSB-Bank N.V. bira banko di kas pa Gobièrnu.

4.4 Baha Gastu

Partidonan lo hasi estudionan pa baha gastu di gobièrnu. P'esei mester baha e gastunan astronómiko na "consultancy", frene uzo di "uitzendbureau" den servisionan kaminda en realitat ta rekerí trahadó den funshon permanente, baha gastunan di overtaim i empoderá órganonan di kontròl di moda ku por tin un kontròl mas eficiente den gobièrnu i den empresanan, fundashonnan i institutonan ku ta kai bou di gobièrnu.

Lo bini ku un fondo nashonal pa remplasá e ayudo di mas año di Hulanda ku a terminá na 2012. E fondo aki lo ser manehá pa institutonan partikular i lo ser alimentá pa rekargonan poné riba e preis di entre otro gasolin. Pa manehá e fondo aki lo mester krea e forma hurídiko pa su akseso i tambe kontròl.

Gobièrnu tin demasiado propiedat ku ta para bashí. Mester sea renobá i usa nan, òf här òf bende nan i asina haña un entrada for di nan. Pa realisá esaki lo traha un Plan di Maneho.

4.5 Kámara di Presupuesto (“begrotingskamer”)

Pa por mantené e situashon finansiero sano, lo introdusí lokalmente un Kámara di Presupuesto ku lo tin como tarea, pa kontrolá e presupuesto i monitòr ehekushon korekto di e presupuesto di Kòrsou.

4.6 Banco Sentral Kompartí

Lo summa pasonan pa evaluá e funshonamentu di Banco Sentral kompartí basáriba rekomendashonnan di rapòrtnan eksistente.

Na mes momentu lo hiba deliberashonnan i finalmente summa e pasonan nesesario pa yega na un Banco Sentral separá pa Kòrsou.

4.7 Impuesto

Tin diferente kambio ku tin ku summa lugá pa loke ta toka e leinan di impuesto. Entre otro revishon di sistema di impuesto (“OZB, Navordering termijnen, Naheffing verkoorten”).

Lo krea insertivo di impuesto como instrumento sosial i ekonómiko den áreanan spesífiko manera entre otro Punda i Otrobanda.

4.8 Sektor finansiero internashonal

Nos sektor finansiero internashonal ta un fuente di entrada i empleo ku ainda tin su importansia. E sektor aki ta sòru tambe pa divisa.

Ku bista riba 2019 gobièrnu lo tin kontakto intensivo ku e grupo aki pa komprondé nan nesesidatnan i kaminda ta posibel tradusí esaki den sosten na e sektor i desaroyo di produktonan nobo den kuadro di e “new midshore reality”.

4.9 Tratadonan fiskal internashonal

Pa evitá “impuesto dòbel” lo hasi esfuerzo pa sera akuerdonan fiskal ku otro paisnan ku enfoke riba Latino Amérika. Pa logra esaki tambe mester promové interkambio i informashon di impuesto, basáriba normanan di Nashonnan Uní i OECD.

4.10 Tratado di “Duana”

Ta importante pa sera tratadonan di “duana” pa asina paisnan por ofresé e tarifanan di aksesu liber òf redusí pa produktonan.

4.11 Akshonnan

Akshon konkretu pa realisá un situashon finansiero saludabel ta lo siguiente.

- Lo no gasta mas ku nos ta produsí. Lo mantené como meta finansiero normanan internashonal ku ta un surplus di presupuesto di 0.5 % di Producto Interno Bruto.
- Fiansa lo ta posibel solamente pa invershon di kapital (“kapitaaldienst”) i no por ta mas haltu ku 5% di e entrada promedio realisá den sektor kolektivo 3 año promé ku e año presupuestario den kual e presupuesto ta keda entregá.
- Lo no tin déficit pa gastunan koriente.
- Lo sigui atendé e problemanan struktural di fondonan di salú i di fondo di penshun ku un subida di edat responsabel i den fase.
- Lo reservá suficiente fondo (un porcentaje di presupuesto) pa iniciativanan sosio ekonómiko.

- Lo pasa mas i mas pa impuestonan indirekto, di moda ku tur bishitante ku tambe ta hasi uso di nos infrastruktura i otro fasilitatnan ta yuda paga.

4.12 Sektor Energétiko

Den e periodo di gobernashon aki lo sigui hasi esfuerzo pa yega na un sektor energétiko duradero hasiendo uso di energia natural i/o energia limpi. Lo promové un sistema energétiko duradero i sostenibel den kua nos mes ta produsí nos energia entre otro hasiendo uso di solo, bientu i laman. Den e kuadro aki lo traha inkansabel pa tene nos refineria habrí, pero na un manera responsabel pa ku nos medio ambiente i salú.

Den e kuadro aki lo studia posibilidatnan pa lanta un “Buro di Energia”.

5. Enseñansa, Siensia, Kultura Deporte (OWCS)

Desaroyo di nos siudadanonan, partikularmente nos hóbennan, via di instrumento di edukashon ta fundeshi pa tur desaroyo den un sosiedat. Pa e motibu ei e gobièrnu aki ta di opinion ku mester duna kada ciudadano, mas tantu posibel, e posibilidat pa desaroyá su talento- i abilidatnan. Sinembargo, diferente aspekto importante den nos komunidat, manera e ròl, situashon i/òf posishon di familia i bario, nivel i komportashon di nos hóbennan, importansia di norma i balornan a bai atras. Tur kaminda por sinti eseí. Ta p'esei Gobièrnu lo usa e tres instrumentonan prinsipal den e kartera aki, esta formashon/enseñansa, kultura i deporte, pa koregí desaroyonan ménos faborabel den nos komunidat, i asina purba trese e kambionan nesesario den e situashon aktual.

5.1 Enseñansa i Siensia

Pa loke ta enseñansa i siensia, e konsentrasjon prinsipal lo ta riba e siguiente áreanan:

- Sistema di enseñansa i siensia;
- Maestro- i dosentenan;
- Alumno-, estudiante- i mayornan;
- Formashon fuera di enseñansa regular.

Sistema di enseñansa i siensia

A ser konstatá ku e aktual sistema i kuríkulo di nos enseñansa no ta tene kuenta suficiente ku nos situashon lokal i desaroyonan internashonal. Ademas tin diferente problema agudo den nos enseñansa ku mester keda atendé rápidamente. Den e kuadro aki lo traha un plan di akshon pa atendé riba témino korto ku e problemanan aktual den nos enseñansa. E puntonan di atenshon mas agudo ta lo siguiente.

- Skarsedat di maestronan di skol.
- Posishon hurídiko di trahadónan den enseñansa.
- Konekshon pa sigui estudionan den ekterior.
- E situashon i posishon di Feffik.
- Maneho di siensia.
- E ròl di Universitat di Kòrsou (UoC) den formashon di nos studentenan.
- Infrastruktura di nos enseñansa, partikularmente mantenshon di skolnan.
- Material i método pa instrukshon di papiamentu.
- Digitalisashon i kreashon di sentro(nan) pa inovashon teknolóxico.
- Optimalisashon di funshonamentu di DOS.
- Revisá i adaptá e normanan di supsidio.
- Instalashon di un “schoolbestuur” pa skolnan públiko.
- Re-instalashon di KBB (Kenniscentrum Beroepsonderwijs Bedrijfsleven).
- Kreashon di un fondo pa spar pa estudio.

- Evaluashon di e maneho di finansiamantu di estudio i kobrañsa i tambe di e organisashon ku ta ehekutá eseí.
- Ehekutá dos proyekto piloto “Komunidat Edukativo” den dos bario marginá, pa stimulá oportunidat igual pa muchanan na skol.
- Evaluá e sistema di VEV-stelsel pa tur fundashonnan (schoolbesturen) etc. den nos enseñansa.

Naturalmente gobièrnu lo atendé e puntonan menshoná ariba segun un sistema di prioridat pa e maneho total, konsiderando e presupuesto disponibel.

Tambe gobièrnu lo entamá un diálogo ku e diferente gremionan (sindikato di maestronan, representashon di mayornan i studiantenan, direktivanan di skol, etc.) pa yega na un reorientashon i renobashon di nos sistema di enseñansa, teniendo kuenta ku e plan Nashonal di Desaroyo di Kòrsou.

Den kuadro di esaki lo pone énfasis riba implementashon di kambionan palabrá. Ademas gobièrnu lo pone énfasis riba dominio di idiomanan i teknologia moderno, pa nos alumno i studiantenan por mantené bon komunikashon ku mundu i pa fasilitá nan estudio den eksterior.

Den kuadro di e reorientashon ariba menshoná, lo evaluá e posibilidatnan di kambio di orario di nos skolnan òf un regulashon adekuá di e asina yamá “naschoole opvang”. Gobièrnu ta di opinion ku un di e opshonnan aki lo por benefisiá e alumno- i studiantenan, i konsekuentemente nos komunitat.

Awor ku enseñansa ta liber, mester studia tambe e posibilidat pa eliminá tur impuesto riba material i ekiponan pa estudio.

Mester evaluá i fortifiká inspekshon i kontrol riba enseñansa pa asina garantisá enseñansa di bon kalidat pa kada hóben di Kòrsou.

Tambe mester bin un maneho pa investigá, registrá i publiká sifranan (estadística) di nos enseñansa riba un base regular, pa asina monitòr e kalidat di enseñansa atrabes di tempu.

Lo reforsá e Lei di Enseñansa Obligatorio, como ku esaki pa un tempu kaba no ta funshoná optimal.

Punto di salida di gobièrnu ta ku enseñansa mester tuma lugá mas tantu posibel den un ambiente pedagógiko adekuá. Konsekuentemente lo evaluá e diferente alternativanan kon pa mitigá e gastunan di koriente, manera entre otro uzo di energia solar na skolnan.

Mirando e revolushon digital rònt mundu, mester digitalisá enseñansa mas tantu posibel i introdusí internèt grátis na tur skol.

Den e totalidat aki gobièrnu lo investigá si mester adaptá e normanan pa supsidio di enseñansa.

Nos enseñansa a produsí pa ottronan tambe, den e sentido ku nos hóbennan a bai studia i keda den eksterior. Studiantenan ku a bai studia sin regresá a hiba na un “brain-drain”. Gobièrnu lo hasi su máximo esfuerzo, esaki huntu ku sektor priva, pa trese nos hóbennan ku a kaba studia kas bek.

Maestro- i dosentenan

Konsiderando e importansia pa nos tin suficiente maestro bon prepará pa guia nos hubentut, gobièrnu lo dediká atenshon spesial na preparashon di maestronan di skol i dosentenan i rekonosementu di e profeshon i su kondishonnan laboral. Huntu ku esaki lo introdusí sistemanan nobo pa evaluá e kalidat di nos dosentenan, introdusí formanan di rekapasitashon kontinuo pa maestronan i insertivonan pa maestronan ku ta funshoná bon. Tambe lo bin ku un maneho pa kombatí e skarsedat direkto di maestronan.

Alumno-, studiante i mayornan

Lo bai atendé ku urgencia ku e problemática di “dropouts/pushouts”, un fenómeno ku no opstante Lei di Enseñansa Obligatorio te ainda ta eksistí, spesialmente bou di nos mucha hòmbernan. Tambe lo evaluá e proyekto “Rebound”.

Esaki ta nifiká ku mester krea un maneho kon, huntu ku otro ministerionan i ku envolvimentu di mayornan, por tene nos hóbennan na skol durante oranan di skol.

Formashon fuera di enseñansa regular

Enseñansa regular ta e promé ruta pa loke ta e suministrashon di edukashon na nos poblashon. Esnan ku ta kai den Enseñansa Obligatorio, inkluso imigrantenan ku nan permanensia no ta formalisá, mester ta na skol partisipando den enseñansa regular. Despues di e edat di Enseñansa Obligatorio, edukashon i formashon mester kontinuá pa esnan ku ke eseí pasobra den enseñansa no tin mag di tin blokeonan pa sigui studia. Ademas, lo entamá un proseso pa eliminá opstákulonan pa enseñansa permanente, pa asina nos pueblo siña balorá i apresiá ku no opstante edat semper un persona (hóben adulto/adulto) por sigui siña òf siña algu nobo i asina mantené un partisipashon real den su komunitat.

Den e konteksto aki, lo averiguá posibilidatnan pa introdusí finansiamentu/beka di estudio pa adultonan ku ainda ke forma nan mes profeshionalmente. Lo mester evaluá e maneho aktual di finansiamentu pa trese esaki mas den konkordansia ku e plan di Desaroyo Nashonal. Tambe lo sigui ku e programa di alfabetisashon (funshonal) pa por eradiká e problema di analfabetismo den nos pais.

Finalmente, nos Biblioteka Nashonal mester bira un centro di informashon moderno. Mirando ku mundu ta digitalisá rápidamente, mester studia posibilidatnan pa aktualisá i modernisá e Biblioteka Nashonal di Kòrsou.

Den e kuadro aki mester krea fasilitatnan teknológiko pa tur skol na Kòrsou tin akseso ilimitá na Biblioteka Nashonal i Bibliotekanan rònt mundu. Tambe mester promové pa e Bibliobùs ta mas frekuente den nos barionan. Esaki mester bai huntu ku un promoshon masal i efektivo di lesamentu.

5.2 Kultura

Kultura ta base pa desaroyo di un komunidat. E ta tambe un instrumènt importante pa edifikashon di pais. ('nation building')

Den e kuadro aki e afan di gobièrnu ta pa yuda desaroyá siudadanonan i famianan fuerte, responsabel, konsiente, kapas i dispuesto pa kontribuí na desaroyo di nos pais. Gobièrnu ta di opinion ku ta di vital importansia pa fortifiká e balor propio di nos hendenan. Solamente ku konosementu di su historia i kultura, e siudadano por skohe konsientemente pa e kosnan ku ta hasié fuerte, i asina realisá e nashon ku e ke.

P'esei gobièrnu lo duna debido atenshon na nos kultura, como e totalidat di medionan, kustumbernan i artefaktonan ku nos komunidat ta hasi uzo di dje pa ekspresá su identitat úniko. Konsekuentemente e maneho di gobièrnu lo ensérá lo siguiente.

- Kreashon di un konsensihi històriko i kultural ku ta kontribuí na desaroyo di nos balornan propio i mas rèspect pa nos mes, dor di promové programanan, manifestashonnan, charlanan i kursonan kultural na nivel lokal, interinsular i internashonal.
- Fomentá mas interes pa nos historia, nos herensia kultural i nos ekspreshonnan kultural dor di promové dokumentashon di nos historia kultural riba tur nivel.
- Promoshon di mas apresio pa nos propio akto i logronan dor di fomentá mas sentido di responsabilidat, fortifiká nos propio identitat, yega na norma i balornan mas fuerte i alsu e nivel di e sentido síviko dor di traha riba un maneho di komunikashon dirigí i reaktiva e kanal di televishon propio ku mester aportá positivamente na formashon kultural.
- Estudio di e posibilidat pa kreashon di un teatro nashonal òf sentro nashonal di arte nobo.
- Promoshon pa nos hubentut, en partikular den barionan, tin e oportunidat pa siña i partisipá den aktividadnan kultural segun e disiplinanan di arte manera: teatro, música, baile eskultura, literatura i pintura.
- Den kuadro di e Plan di Desaroyo Nashonal mester evaluá i restrukturá sentronan di bario pa kumpli ku e meta aki i e sentronan mester keda aksesibel pa tur siudadano.
- Stimulashon di un industria di produktonan kultural i artístiko lokal.
- Simplifikashon, fleksibilisashon digitalisashon di e proseso di pèrmit pa músiko- i artistanan (internashonal).
- Integrashon di arte den kuríkulo di skolnan i estudio di e posibilidat pa re-instituí un akademia di arte na Kòrsou.

5.3 Deporte

Edukashon fisiko en general i deporte en particular ta pilánan importante ku ta kontribuí na formashon i salú fisiko i mental di hende. Ámbos tin efektonan benefisioso pa nos desaroyo personal, manera: relahamentu, dominio propio, konsentrashon, sentido di éxito, redukshon di obesidad, kompañerismo i koheshon sosial. Alabes deporte ta promové patriotismo i internashonalisashon di e produkto Kòrsou, partikularmente ora atletanan di Kòrsou tin ku kompetí den eksterior.

Gobièrnu lo promové partisipashon aktivo i pasivo na deporte dor di nos poblashon i spesialmente hubentut i lo stimulá medidanan pa nos hubentut hasi mas ehrsisió fisiko i deporte pa asina evitá problemanan ku sobre peso.

Pa logra e metanan deseá riba tereno di deporte, gobièrnu tin e siguiente akshonnan planeá den kuadro di maneho, medionan finansiero disponibel pa deporte, organisashon di deporte i formashon.

Maneho

- Garantisá edukashon fisiko i deporte na tur nivel di enseñansa i krea fasilitatnan pa esaki.
- Promové i stimulá deporte den bario i kompentensianan deportivo entre barionan..
- Implementá fuera di deporte di base, tambe un maneho dirigi riba "top sport".
- Kreashon di un maneho pa otorgá "studiepunten" pa skol.
- Maneho agudo pa solushoná skarsedat di dosentenan pa edukashon fisiko.
- Introdukshon di un maneho nobo di akomodashon di tur infrastruktura deportivo.
- Investigashon pa introdusí un sistema di beka pa estudionan deportivo den eksterior i na Kòrsou mes.
- Introdukshon di un maneho transparente i efektivo i un lei di deporte, un ke otro despues di a konsultá ku e gremionan relevante.
- Sostené deporte pa hende ku desabilidat fisiko i mental i krea fasilitatnan deportivo pa esaki.
- Traha riba re-introdusí weganan de Reino.

Finansa

- Introdukshon di un fondo nashonal pa promoshon di deporte ("sportfonds").
- Mantenshon i reevaluashon di reglanan di supsidio pa atletanan.

Organisashonnan

Skol

- Stimulashon di deporte pre-eskolar mas tempran posibel.
- Re-introdukshon di deporte como parti di e kuríkulo eskolar.
- Re-introdukshon di lès di landamentu pa tur mucha entre 8 pa 10 aña nivel di diploma-A

Bario

- Re-introdukshon di boluntarionan i lidernan deportivo den barionan.

Organisashonnan di deporte

- Stimulá organisashonnan di deporte pa nan por desaroyá i funshoná segun normanan internashonal.

Formashon

- Institushon di un Akademia di Deporte nobo.
- Investigashon di maneranan pa traha strukturá riba e problema di agreshon den deporte.

6. Salubridat, Medio Ambiente, i Naturalesa (GMN)

Prevení ta mihó ku kura.

Gobièrnu lo tin como punto di lansa pa loke ta salú pùblico pa logra pa kada siudadano un salubridat di kalidat, aksesibel i pagabel. Tambe pa krea un ambiente di biba saludabel. Huntu ku eseí tin ku buska e balansa entre nos poblashon ku ta embeyese i gastunán di salubridat pùblico. Lo pone hopi énfasis riba duna informashon na komunitat.

6.1 Prevenshon

Kido di hende mester ta dirigi riba prevenshon di malesa i stress.

Kura malesa ta importante, pero mas importante ta hasi nos pueblo konsiente kon e mes por yuda kuida su salú.

Biba salu dor di kome salú i moveshon, como elementonan determinante di prevenshon lo ser promové.

Gobièrnu lo karga su responsabilidat dor di informá i eduká ku programanan den media i na skolnan kon pa biba salú.

Via medionan sosial lo stimulá bon alimentashon i lo desanimá uzo di supstansianan dañino pa salú di nos komunitat. Lo pone énfasis tambe riba salu mental i maneho pa prevení adikshon espesial pa nos hóbennan.

Lo promové moveshon i rekreashon masal kreando mas facilidat di deporte i infrastruktura den áreanan urbano.

Tambe lo forma mas lider di formashon físiko i deporte pa funshoná den barionan.

Lo stimulá un maneho kaminda dòkternan di kas ta biba i funshoná den e bario.

Lo duna informashon riba malesanan króniko i riba komportashon seksual bou di hóbennan.

6.2 Hospital nobo

E Hospital Nobo Otrobanda mester ta garantia pa duna kido igual di kalidat haltu, duradero i pagabel, den kual e personal lo ser eduká i formá pa kontribuí na esaki. Mester tene na kuenta e proseso di transishon.

Basá riba e rapòrt di evaluashon, gobièrnu lo tuma desishonnan nesesario kon pa sigui realisá e hospital nobo.

6.3 Leinan di seguro

Gobièrnu lo bai evaluá e lei di Seguro Básiko i e lei di Labizjan i kaminda ta nesesario lo adaptá e lei i hasié mas eficiente. Atenshon speshal lo bai pa esnan ku no ta inklui den e pakete básiko ainda.

6.4 Edat di penshun

Refiriendo na resultado di konklushonnan di diálogo nashonal, gobièrnu lo regla edat di penshun den lei laboral pa evitá oumentu di pobresa bou di personanan di 60 pa 65 año. Lo bai duna atenshon na e problemátiko di esnan di edat entre 60 i 65.

6.5 Eskases di spesialista

A konsekuensiencia di eskases di spesialista e tempu di espera pa un sita ta oumentá i esaki ta inaseptabel.

E gobièrnu aki ta konvensí ku mester baha e tempu di espera aki i esei por tuma luga dor di stimulá nos dòkter pafó di pais pa nan bini bek i tambe dor di trese mas spesialista for di eksterior. Esaki lo rekerí evaluashon di e maneho eksistente di atmishon di spesialista.

6.6 Inspekshon

Inspekshon mester keda intensivá den instansianan di kuido. Esaki ta konta tambe pa otro areanan di gobernashon.

6.7 Kido di medio ambiente i naturalesa

Un faktor importante pa kuida salú di poblashon ta un bon kido di medio ambiente i naturalesa. Gobièrnu lo dirigi su maneho riba redusí i prevení mas tantu posibel e polushon di nos airu, awa i tera pa medio di aplikashon di lei i reglanan eksistente na un manera desidido i ku man duru. Lo traha riba konsientisashon pa nos naturalesa den laman (marine-awareness).

Lo pone atenshon riba mantenshon di nos damnan i riba "watermanagement" en general.

Lo pone mas atenshon na nos parkenan ku ta algu positivo pa tantu nos hendenan lokal como pa turista.

Lo paga atenshon na kambio di klima mundial i na Kòrsou, i kaminda te nesesario lo tene kuenta.

Lo bin ku un maneho di sushi ku lo trese solushon duradero den nos maneho di tene Kòrsou Limpi.

6.8 Bienestar di animal

Gobièrnu lo hiba un maneho ku ta tene kuenta ku bienestar di animal entre otro pa medio di supsidio pa asilo di bestia i kampañanan informativo.

Tambe gobièrnu lo vigilá i reforsá regulashonnan kontra maltrato di bestia.

6.9 Raad voor de Volksgezondheid i otro leinan

Gobièrnu lo studia e posibilidat pa mas pronto posibel re-institui e asina yama "Raad voor de Volksgezondheid".

Lo inventarisá ademas e diferente leinan ku tin den konsepto den e area di salu públiko, manera e BIG-wet, etc. i si nan ta kuadro e maneho di Gobièrnu introducí e leinan.

6.10 Maneho di Agrikultura Peska i Krio di bestia

Na promé lugá lo bini ku regulashonnan pa ku nos awa den suela. (grondwater)

Gobièrnu lo duna sosten na nos kunukeronan, pa nan por hisa nan produkshon i abastesé un parti mas grandi di nos poblashon ku kuminda. Lo introducí insentivonan finansiero i fiskal pa por stimulá nos kunukeronan lokal.

Lo drechi e situashon pa e piskadónan lokal, dor di krea mas fasilitat. Tambe lo stimulá nan pa yega na forma koperativanan.

7. Desaroyo Sosial, Labor i Bienestar (SOAW)

Gobièrnu ta konsiderá e sektor di desaroyo sosial, labor i bienestar sumamente importante teniendo kuuenta ku e punto di salida di e akuerdo di gobernashon aki ku ta Dignitat Humano ta Sentral.

Den e kuadro aki e Ministerio di SOAW den su trabounan lo pone énfasis riba e echo ku bienestar di e hende ta sentral i pa logra esaki e trahamentu inter-ministerial ta di sumo importansia. Den e kuadro aki lo tin atenshon tambe pa kombatí pobresa.

7.1 Situashon sosial i kalidat di bida

E situashon sosial i kalidat di bida di un gran kantidat di siudadano ta fuente di preokupashon. Esaki sigur ta konta pa e adultonan mayor, mamanan soltero, hóbennan i personanan ku limitashon. E situashonnan aki ta pidi atenshon a korto plaso.

Den e próksimo periodo di gobernashon lo hiba un maneho pa alsa kalidat di bida pa asina krea un balansa entre e situashon ekonómiko/finansiero i situashon sosial.

Pa traha riba mehorashon di situashon sosial i kalidat di bida di nos pueblo, gobièrnu lo hiba un aserkamentu di ‘bottom-up’ den e sentido ku lo kuminsá analisá e situashon di kada habitante den bario. Gobièrnu aki tin ròl di fasilitadó, dor di entre otro finansiá i pone sosten profesional disponibel pa garantísá esaki.

Lo sigui drecha infrastruktura den barionan, esaki tambe den kuadro di drecha kalidat di bida di e siudadano i evitá mas deterioro sosial di barionan. Esaki lo yuda den sierto sentido tambe pa hisa siguridat den bario.

7.2 Fortifikashon di Famia

E núkleo di famia ta e base pa edukashon sosial i moral di nos yunan. Gobièrnu lo introdusí programanan na televishon i radio, pa stimulá formashon i mantenshon di famia. Pa fortifiká esaki lo krea kondishonnan adekuá pa un desaroyo familiar sano i balansá.

Lo analisá e posibilidat pa introdusí djadumingu kompletamente liber pa nos trahadónan (Sunday-law).

7.3 Formashon

Nos tin diferente hóben i adulto ku a kai for di e sistema di enseñansa regular pa diferente motibu. Ta solamente a base di formashon direkto por prepará nan pa drenta trabou bèk. Por ehèmpel atrabes di e proyekto “1000 hóben na trabou” i tambe formashon direkto pa un fishi atrabes di FEFFIK.

Pero tambe lo sostené dunadónan di trabou sea den horeka, den konstrukshon, òf den administrashon na momentu ku nan indiká kua ta e fishinan ku nan tin mester trahadó p’è.

Ademas lo stimulá tur invershionista ku ta kuminsá ku proyektonan grandi manera refineria i planta di gas, hotèl nobo, konstrukshon grandi manera ta e kasos ku hospital nobo, pa nan invertí tambe den kursonan i proyektonan spesífiko pa e trahadónan ku nan ta bai tin mester.

Gobièrnu lo ta dispuesto pa kontribuí.

Pa e proyektonan aki ta duradero mester bini ku inspekshon sosial.

Lo tin atenshon pa formashon di esnan ku ta kobra “onderstand”, den e sentido ku lo formanan i hinka nan den e proceso laboral.

Lo duna atenshon tambe na formashon di mayornan kaminda esaki ta nesesario.

7.4 Labor

Pa krea e kondishonnan adekuá di labor i pa garantisá un koneksió eficiente entre demanda i oferta di labor, prioritat lo ta pa bini ku maneho di merkado di labor.

Trabou ta importante pa independensia i dignidat di e "hende". Un kondishon importante pa un bon kalidat di bida ta garantia riba trabou i entrada. Na mes momentu mester akseptá sí ku e empresario ta importante pa desaroyo di ekonomia.

Pa krea trabou gobièrnu lo pèrkurá pa e kondishonnan adekuá pa un bon klima di invershon pa invershonianan por kumpli ku nan parti.

Tarea di gobièrnu ta pa krea e kondishonnan pa realisá un balanse entre e dos partidonan. Pèrkurá pa hiba kòntròl efektivo i evitá asina ku deterioro di merkado laboral ta influensiá akseso di nos hendenan na trabou.

Kosto di bida ta un fuente grandi di preokupashon pa gran mayoria di nos hendenan. Lo aselerá e proceso pa yega na un penshun general pa tur trahadó.

Mester tin un bon relashon entre gobièrnu, empleado i su representashon sindikal i dunadó di trabou. Niun no por ta eksitoso sin e otro i p'esei un relashon optimal entre e partidonan aki ta eksigencia sin mas pa produktividat i satisfakshon di trabou. E tarea primordial di gobièrnu, den e relashon tripartit aki, ta pa krea e kondishonnan adekuá pa invershonianan den ekonomia i ekonomia sosial tuma lugá pa krelementu ekonómiko i oumento di kuponan di trabou ku kondishonnan laboral i suèldunan hustu. Mester revisá leinan laboral pa realisá benefisionan mutuo i duradero pa tantu e trahadó como e dunadó di trabou.

E relashon entre e trahadó i dunadó di trabou lo tin atenshon kontinuo di gobièrnu. Den e kuadro aki, gobièrnu lo sigui sostené e konsepto di diálogo.

Salí for di e punto di bista aki, gobièrnu ta apoyá e plataforma di Diálogo Nashonal.

Lo inisiá e trayekto pa pone e trahadó como number un (1) riba lista di preferensia na momentu ku kompanianan bati bankarota.

Permanensia ilegal di estranheronan na Kòrsou kasi semper ta trese kuné ku kuponan di trabou pa hende lokal ku tur tempu a sakrifiká pa awe tin mas trabou, ta bai pèrdí. Tin tambe esnan ku ta legal na Kòrsou, p.e. como turista óf studiante, ku ta okupá kuponan di trabou di forma ilegal. Gobièrnu lo trata na minimalisá i kontrolá mas tantu posibel entrada di personanan indokumentá óf ku un nivel di preparashon abou.

En koneksió ku esaki lo wak si mester adaptá e lei di 80-20 óf introducí kualke otro forma pa protekshon di empleo lokal.

Lo intensivá inspekshon di trabou ("arbeidinspectie") i si ta nesesario lo amplia e kantidat di inspektornan.

7.5 Suèldu mínimo

Labor ta un nesesidat, pero kompensashon pa e labor prestá mester ta hustu.

E suèldu mínimo aktual no ta yega pa kumpli ku e nesesidatnan básiko i hasta ta obligá hopi hende ku tin trabou pa buska un di dos trabou loke atrobe ta afektá e merkado laboral, bida familiar i sosial i salú.

Suèldu mínimo aktual ta bou di e suèldu ku por garantisá un eksistensia digno i humano. Fuera di salario mínimo, lo sòru pa e hende lokal bini promé na remarke ora ku tin vakatura/trabou. E filosofia lo ta “kada yu di Kòrsou na trabou promé”. Si ta nesesario lo introdususí e leinan nesesario.

Den e kuadro di un suèldu hustu e gobièrnu aki lo oumentá durante 4 año konsekutivo e suèldu mínimo den 4 parti, pa yega na un suèldu mínimo hustu i konforme nos leinan.

8. Desaroyo Ekonómiko

Gobièrnu lo duna prioridat pa logra un krementu ekonómiko duradero i sostenibel i pa tin un partisipashon amplio di tur yu di Kòrsou den nos ekonomia.

Den e kuadro di e filosofia di “Blue Economy” gobièrnu lo eksplorá e posibilidatnan pa utilisá nos rekursenan natural ku Kòrsou tin na abundansia na un manera responsabel pa generá aktivitat ekonómiko i kreashon di empleo. Gobièrnu lo instituí un plataforma “Blue Economy” pa encargá ku e tarea aki.

Krementu ekonómiko i trabou ta ser realisá dor di empresarionan, ku sosten di gobièrnu ku lo mester tin e ròl di fasilitadó kreando e kondishonnan adekuá, manera:

- A. Eliminá “Redtape” (eliminá pèrmitnan innesesario i digitalisá prosesonan di duna pèrmit).
- B. Baha kosto di hasi negoshi.
- C. “Manpower planning”.
- D. Partisipashon aktivo i kolaborá ku partnernan sosial den plataforma Diálogo Nashonal.
- E. Desaroyá Entrepeneurship.

8.1 Sektoran di atenshon spesial

Lo stimulá krementu ekonómiko en general, pero gobièrnu lo identifiká algun área ku lo haña atenshon spesial.

Ta trata di áreanan/proyektonan konkreto ku tin e potensial pa krea kupo di trabou rápido i ku ta trese divisa i invershon estranhero fresku den nos ekonomia.

Esakinan ta:

- A. Refineria Petrolero i su áreanan di sosten
- B. Infrastruktura Turístiko i Horeka
- C. Sektor Finansiero Internashonal
- D. Sektor logístico (Haf marítimo i Aeropuerto)
- E. Empresanan mikro i MKB
- F. Koperativismo
- G. “Digital Economy” (“Smartnation”)
- H. Diplomasia Ekonómiko Internashonal
- I. Revitalisashon Ekonómiko
- J. Institushon di un “Centraal Planbureau”

8.2 Refineria Petrolero i su áreanan di sosten

Refineria ta bai ta un di nos pilar ekonómiko di mas fuerte den tempu binidero. Minister pa Asuntunan General lo ta encargá ku refineria.

8.3 Turismo

E Plan Maestro “Tourism Masterplan 2015 - 2020” lo sigui komo e guia den turismo.

Gobièrnu lo desaroyá banda di esaki un plan integral pa Bândabou, Ostpùnt, Kosta Sur i lo stimulá empresanan mikro i mediano pa partisipá den e desaroyo, lo enfoká riba entre otro “eco-

tourism” i tambe “wellness tourism”. Esaki lo tuma lugá den koperashon ku e.o. e ministerio di VVRP.

Ta importante pa gobièrnu apliká e “smart technology” pa kolekshoná data relevante pa promoshon turístiko.

Adishonalmente gobièrnu lo inventarisá e terenonan otorgá ku metanan turístiko ku no a wòrdú desaroyá i pa duna esakinan na otro desaroyadó.

Konhumentante ku otro Ministerionan relevante mester krea trayektonan di formashon i entrenamentu pa hendenan ku ta òf ke laborá den turismo.

Lo eksplorá e posibilidat pa re-institui “Kenniscentrum Beroepsonderwijs Bedrijfsleven” (KBB) i tambe fortalesé Academy Hotel.

Gobièrnu lo bai evaluá e kondishonnan aktual a base di kua ta duna “tax holiday” na proyektonan hotelero i lo bin ku kambionan si ta nesesario.

8.4 Sektor finansiero internashonal

Nos sektor finansiero internashonal ta un fuente di entrada i empleo ku ainda tin su importansia. E sektor aki ta sòru tambe pa divisa.

Ku bista riba 2019 gobièrnu lo bai tin kontakto intensivo ku e grupo aki pa komprondé nan nesesidatnan i kaminda ta posibel tradusí esaki den sosten na e sektor i desaroyo di produktonan nobo den kuadro e “new midshore reality”.

Lo evaluá e posibilidat pa yega na mesun akuerdonan ku Hulanda tin ku otro paisnan.

8.5 Sektor logístico (Haf marítimo i Aeropuerto)

Gobièrnu lo sigui hasi invershonnan nesesario entre otro pa realisá e di dos Megapir, desaroyo rondó di Waaigat/Schottegat, “upgrading” i ekspanshon di nos aeropuerto, sigui komersialisá e terenonan rondó di nos aeropuerto i hafnan i fortalesé posishon stratégiko di nos zonanan ekónomiko. Un ke otro den estrecho koperashon ku e ministerio di VVRP.

Gobièrnu ta rekonosé e potensial di Bullenbaai como “deep sea Harbour”. Lo enkargá un team multi-disiplinario ku desaroyo di esaki.

Gobièrnu lo sigui sostené establesimantu i desaroyo di e Maritime Trainingcentrum na Dok.

Gobièrnu lo studia posibilidatnan pa amplia rutanan di transporte aéreo i marítimo den Caribe pa eksportashon.

Gobièrnu lo enfoká pa oumentá “airlift” for di otro paisnan i tambe lo studia posibilidat pa baha tarifa aéreo i e gastunan adishonal entre paisnan den Reino .

8.6 Empresa Mikro i MKB

Nos empresarionan lokal mikro i MKB lo por konta ku mas sosten di Gobièrnu como ku nan ta forma e wesu di lomba di nos ekonomia. Lo traha den estrecho koperashon ku entre otro Adekk pa duna kontenido na esaki.

Komo parti di e strategia pa stimulá e ekonomia inklusivo, gobièrnu lo bini ku programanan i kursonan pa krea mas empresario mikro i MKB.

Partikularmente pa empresanan mikro lo studia e posibilidat pa introdusí “microlending”. Tambe lo studia e posibilidat pa amplia e finansiamentu pa empresanan MKB i start-ups, pa sea industria chikí, compra i benta, peska, agrikultura i krio di bestia òf horeka.

Peska, agrikultura i krio di bestia lo haña atenshon spesial den e sentido ku e gobièrnu aki lo intensivá su kontakto ku esnan enbolbí i saka afó den ki forma mas por sostené nan.

Lo animá esnan enbolbí pa nan organisá nan mes, sea den koperativa òf di otro forma pa asina gobièrnu por sentralisá su ayudo. MEO i GMN, den estrecho kolaborashon, lo traha riba un struktura mas adekuá pa sostené desaroyo di e sektor aki.

E punto di salida ta ku nos produkshon lokal mester por bai abastesé i finalmente lo supstansia un parti supstancial di nos merkado.

8.7 Koperativismo

Kòrsou tin un historia riku riba tereno di koperativismo, manera koperativanan di spar i krédito (“credit unions”) i tambe koperativanan sektoral manera den sektor agrario.

Pa promové desaroyo sosial-ekonómiko duradero, desaroyo sektoral (p.e. agrikultura, peska, sektor kreativo), desaroyo sosial empresarial (“corporate social responsibility”) i kolaborashon empresarial pa mehorá akseso na konosementu, teknologia i finansiamentu, gobièrnu lo promové i yuda fortalesé koperativanan. Esaki partikularmente esnan dirigí riba aktividadnan ekonómiko. Pa logra esaki gobièrnu lo traha huntu ku FEKOSCAN pa amplia konsientisashon i konosementu riba temanan di koperativismo, pero tambe studia posibilidat pa krea kondishonnan faborabel (p.e. fiskal) ku ta hasi posibel pa koperativanan floresé na Kòrsou.

8.8 Digital Economy ('Smartnation')

Implementá e Master Plan: “E-Commerce Road Map 2016-2018”, huntu ku “stakeholders” relevante pa krea kondishonnan nesesario pa alsa posibilidat pa empresanan di Kòrsou (chikí i mediano), por partisipá den ekonomia digital, p'asina por brinda servisio i produktonan na konsumidónan rònt mundu. Konektividat (transporte, komunikashon, transakshonnan finansiero) i akseso na ekonomia digital (“e-commerce”) ta e miró manera pa ekspandé merkado pa nos empresarionan lokal i pa stimulá inovashon, kompetitividat i krelementu di negoshi pa medio di eksportashon.

Lo hasi esfuerzo pa tambe establecer un ekonomia digital lokal, promoviendo entre otro transakshonnan digital (pago), merkadonan “online” pa empresanan lokal (“e-market place”) i interkambio ku servisionan di gobièrnu via bentana digital.

8.9 Diplomasia Ekonómiko Internashonal

Gobièrnu lo fortalesé relashonnan komersial ku paisnan den Latino Amérika i Karibe, pa medio di diplomacia ekonómiko pa amplia posibilidatnan di kolaborashon entre gobièrnunan, organisashonnan sektoral, institutonan di edukashon i empresanan individual pa asina promové ‘entrepreneurship’, inovashon, eksportashon i generashon di divisa.

Lo enfoká entre otro riba lasonan ku Colombia, Cuba i Repùblica Dominikana ku kua ya tin akuerdonan firma (MOU). Ku otro paisnan lo sigui eksplorá posibilidatnan pa aktividadnan mas espesífiko.

Lo fortifiká i estrechá lasonan komersial ku Hulanda i Oropa. Den esaki lo hasi uzo optimal di e relashonnan históriko, kultural, komersial eksistente, relashonnan familiar i embahadanan di Reino den Region.

8.10 Revitalisashon ekonómiko

Gobièrnu lo desaroyá i promové aktividat ekonómiko i invershon den nos sentro di siudat a base di un vishon di *Willemstad den siglo 21* ("SMART City"); un siudat riba lista di patrimonio di humanidad (UNESCO) pero ku un kontenido moderno, futurístiko, inkluyendo un ekosistema empresarial vibrante, aksesu na teknologia i konektividat ICT "state of the art", hospitalidat i bibienda moderno pa tantu turista i nos hendenan lokal (hóbennan en partikular), i un centro di edukashon, kultura i rekreo ku henter poblashon tin aksesu na dje.

E desaroyo aki lo sirbi como modelo pa mehorá kalidat di bida den tur nos barionan.

8.11 "Centraal Planbureau"

Den kolaborashon ku entre otro BPD i CBS, lo instituí un "Centraal Planbureau Curaçao" (CPBC), como un unidat independiente, ekipá pa hasi análisis ekonómiko di entre otro programanan di gobernashon, presupuesto di mas aña, maneho òf kambio di maneho i proyektonan grandi ku tin impakto sosial-ekonómiko.

CPBC lo sirbi tur ministerio di gobièrnu pero tambe Parlamento, Plataforma Diálogo Nashonal, den kua tin representashon di sindikato i dunadó di trabou. CPBC su meta prinsipal ta pa analisá konsekuensianan di maneho òf kambio di maneho pa nos desaroyo sosial i ekonómiko i pa mantené un banko di dato (históriko) sosial-ekonómiko di Kòrsou.

Planifikashon i kontenido di maneho lo keda responsabilidat di gobièrnu.

9. Tráfiko, Transporte i Planifikashon Urbano (VVRP)

Gobièrnu lo kontinuá ku trabounan di infrastruktura na entre otro Punda/Otrobanda, Marie Pampun, Sta Rosa wèg, etc.

Tambe e maneho pa loke ta okupashon ilegal di tereno i awa lo kontinuá.

9.1 Maneho di tereno

Lo revisá e lista largu di espera pa por bin na remarke pa un tereno pa traha kas. Esaki lo duna un empuhe grandi na solushon di skarsedat di bibienda pasobra ta konosí ku si un yu di Kòrsou por disponé di un pida tera e ta traha su kas segun su forsa.

Pa loke ta e terenonan di här pa traha kas, kaminda esaki ta posibel, lo kambia esakinan den tereno di "erfpacht" pa hendenan por haña hipotek, pa mantené i drecha nan kas.

Lo mester apartá terenonan apropiá (ta bon pa ekspertonan definí kiko i kua ta apropiá) pa agrikultura i duna esnan ku kier planta o tene krio di bestia oportunidat pa bin na remarke pa esaki dentro di un tempu rápido. Esaki basá riba un maneho di nesesidat di Kòrsou.

Lo introdusí un prohibishon general pa otorgá tereno na kosta, ku ta surpasá e línea di 25 meter "awa haltu" for di kosta. Lo garantísá pasashi liber pa playanan pa pueblo di Kòrsou.

Pa sigú e maneho aktual pa kombatí tereno i awa ilegal lo sigú aktua kontra ilegalidat pa asina sòru ku kumplimentu ku lei i reglanan eksistente.

9.2 Destinashon di Tereno (EOP)

Lo revisá EOP, lo introdusí zonifikasihon ku introdukshon di e sistema Forma, pero mester mantené e balansa den e uzo di tera. Esaki ta nifiká ku ta mantené e prinsipio di zonifikasihon, pero ta dediká un parti mas amplio na desaroyo urbano, esta bibienda i komersio.

9.3 Bibienda

Tin miles di kas ilegal i hopi kas bashi, miéntras na mes momentu miles di hende tin añanan largu riba un lista di espera pa warda un kas di FKP òf warda tereno "makro PPP", mikro PPP", "zelfbouw".

Gobièrnu lo inventarisá tur proyekto di FKP ku no ta kana i lo remedíá esaki. Lo traha un plan ku akshonnan konkretu pa eliminá e retraso di konstrukshon di kas i atendé e lista di espera na FKP.

Gobièrnu lo formalisá e akuerdo ku FKP pa loke ta maneho di kasnan di Gobièrnu. Tambe lo analisá e sistema di supsidio di här pa famianan ku debe FKP.

Lo pone tereno na disposishon di FKP, pa por aselerá konstrukshon di kas, pa yuda eliminá e lista di espera mas lihé posibel. Tambe trese un kambio den e ordenansa di sistema di lista di espera di FKP.

Lo instruí FKP pa traha algun modelo alternativo di konstrukshon duradero i ekónomiko, pa di tal forma otronan por kopia esakinan. Den e modelonan lo pone énfasis riba spar energia, spar material, spar awa, un medioambiente sano paden i pafó, ku ta trese tiki molèster pa ku lus, zonido etc, ku no kondusí na polushon, ku uso di material re-usabel.

Gobièrnu lo desaroyá un sistema di sertifikasihon pa e tipo di kasnan aki. Universidat di Kòrsou por yuda investigá kua sistemanan pa konstrukshon ta duradero na Kòrsou.

Lo pone mas atenshon na mantenshon di e kasnan di FKP. Lo traha un plan di mas aña. Lo sòru pa fortifikashon supstansial di e kandidat di trahadó na ministerio di VVRP, pa nan, despues di un bon entrenamentu, por atendé e problemanan aki. Mayoria di biaha regulashon i legislashon den e áreanan aki ta na òrdú, pero aki tambe tin falta di aktuashon. Gobièrnu lo optimalisá su servisionan dor di atendé ku kehonan mas eficiente i efikas. Pa esaki ministerio di VVRP tin ku hasi e kambionan nesesario den su organisashon. Ademas pueblo mester haña oportunidat pa hasi su keho na un manera mas fasil i eficiente por ehèmpel via telefòn, e-mail i wèpsait.

9.4 Transporte Pùblico

Mester reformá e sistema di transporte pùblico na Kòrsou. Pa esaki mester hasi un estudio i bini ku proposishonnan konkretu pa determiná kua ta e mihog manera pa yega na un restrukturashon di transporte pùblico na Kòrsou.

ABC-busbedrijf huntu ku bùsnan chikí, mester forma un ret ku ta hasi Kòrsou aksesibel pa tur bario i for di tur bario. Konsekuentemente mester amplia e aksesibilidat di ABC na mas bario i adaptá su supsidio pa e por amplia e serviso.

Gobièrnu lo sigui animá ABC-busbedrijf pa nan sigui ku nan maneho di sirbi tur bario di Kòrsou.

Gobièrnu lo sostené e shofùrnán di bus chikí ku ke forma un koperativa pa asina baha nan gastu di kompra di bus.

Tambe gobièrnu lo buska eksperto pa revisá i adaptá i modernisá e lei di transporte pùblico.

Gobièrnu lo buska eksperto pa yega na un estudio di faktibilidat pa un sistema sostenible pa transporte pùblico, p.e. sistema di "Bus Rapid Transport" (BRT).

9.5 Tráfiko Sigur

Pa basta aña kaba siguridat di tráfiko ta bou di preshon. E kandidat grandi di aksidente tur dia i e kandidat pa kabes relativamente haltu di víktima mortal ta mustra un tráfiko insigur. Esei ta primeramente debí na mal komportashon den tráfiko.

Ultimo añanan a tuma lugá un esfuerzo pa recuperá e retraso di mehorashon di infrastruktura (e.o. drèmpel) i na diferente krusada peligroso a traha plenchi di tráfiko (rotònde).

Gobièrnu ta di opinion ku mester kontinuá ku e maneho liña aki di mehorashon di infrastruktura. Huntu ku eseí mester hasi kontrol regular, efektivo i riguroso pa prevení komportashon irresponsabel i insigur den tráfiko.

9.6 Bario

Renobashon di bario ta nifiká ku e infrastruktura di bario, esta kaminda, asera, plenchi, mester haña hopi atenshon. Lo trata mas tantu posibel pa kamindanan tin asfalt, asera i lugá pa kore baiskel.

Barionan mester di sitionan di enkuentro sosial manera plenchi, parke di rekreo i lugá pa hasi deporte. Kanchanan deportivo multifunshonal den bario (kaminda esaki ta posibel i deseabel lo keda konektá riba e ret pùblico di iluminashon i lo pone fondo disponibel pa esaki.

Lo revisá nos leinan i kuminsá atendé e kandidat di kasnan i monumentonan bashí i bandoná den bario. Si mester ta adaptá e lei di ekspropiashon di tal forma ku por ekspropiá e kasnan aki mas lihé.

E proyekto di duna kada kas un adrès i number korekto lo sigui.

Lo sigui ku mantenshon di kaminda i mantenshon di roinan ku mas tantu vegetashon posibel den kanalnan.

Tambe lo sigui ku mantenshon di infrastruktura como parti di maneho duradero pa alsa kalidat di bida.

9.7. Sektor marítimo

Gobièrnu lo hiba un maneho pa mas tantu kompanianan di barku registrá nan barkunan na Kòrsou I asina nabegá bou di bandera di Kòrsou. Lo hasi e adaptashonnan nesesario den nos leinan di nabegashon pa hasi nos pais atraktivo pa esaki.

9.8 Telekomunikashon

Mester modernisá e leinan aktual di telekomunikashon pa stimulá desaroyo di telekomunikashon pa Kòrsou i konsekuentemente na bentaha di suidanonan.

9.9 Aviashon

Gobièrnu lo tuma e pasonan nesesario pa aselerá e proseso pa nos pais ta bèk na kategoria 1. Ademas mester modernisá e leinan vigente.

Tambe mester krea kondishonnan hustu ('fair level playing field') pa tur kompania di aviashon ku ta òf ke bai operá riba merkado lokal. Ademas mester determiná kua ta e mihó forma pa atendé ku kompetensia inhustu di kompanianan ku ta operá fisikamente den eksterior. ("over the top providers")

